

T-3

Na osnovu člana 16. stav 4. Zakona o Vladi Zeničko-dobojskog kantona - Prečišćeni tekst („Službene novine Zeničko-dobojskog kantona“, broj: 7/10 i 3/23), na prijedlog Ministarstva za rad, socijalnu politiku i izbjeglice, Vlada Zeničko-dobojskog kantona, na 14. sjednici, održanoj dana 29.01.2024. godine, d o n o s i

ZAKLJUČAK

I.

Prihvata se Mišljenje Ministarstva za rad, socijalnu politiku i izbjeglice broj: 09-02-19404-1/23 od 24.01.2024. godine, o Prednacrtu Zakona o organizaciji penzijskog i invalidskog osiguranja, koji je kantonima dostavljen na mišljenje od strane Federalnog ministarstva rada i socijalne politike.

II.

Zaključak Vlade Zeničko-dobojskog kantona sa Mišljenjem Ministarstva za rad, socijalnu politiku i izbjeglice iz tačke I. ovog zaključka upućuje se u dalju skupštinsku proceduru.

III.

Zaključak stupa na snagu danom donošenja.

Broj: 02-02-1911 /24
Datum, 29.01.2024. godine
Zenica

DOSTAVLJENO:

1x Ministarstvo za rad, socijalnu politiku i izbjeglice,
1x Stručna služba Skupštine,
1x a/a.



PREMIJER

Nezir Pivić



ZENIČKO DOBOJSKI KANTON
VLADA

n/r Premijera
n/r Sekretara

Broj: 09-02-19404-1/23
Zenica, 24.01.2024. godine

PREDMET: Mišljenje Prednacrta Zakona o organizaciji penzijskog i invalidskog osiguranja, daje se

Federalno ministarstvo rada i socijalne politike je aktom broj: 04-02/1-3932/23 MT od 19.12.2023. godine, kantonima dostavilo tekst Prednacrta Zakona o organizaciji penzijskog i invalidskog osiguranja (u daljem tekstu: Prednacrt Zakona) radi davanja mišljenja na predloženi tekst, budući da je oblast socijalne politike u zajedničkoj nadležnosti federalne vlasti i kantona, u skladu sa članom III.2 i III.3 Ustava Federacije.

Nakon razmatranja dostavljenog teksta Prednacrta Zakona ovo ministarstvo u okviru svoje nadležnosti daje sljedeće:

MIŠLJENJE

Uvidom u dostavljeni Prednacrt Zakona, utvrđeno je da je istim utvrđena organizacija Federalnog zavoda za penzijsko i invalidsko osiguranje (u daljem tekstu: Zavod), organi upravljanja i njihove nadležnosti, uvjeti imenovanja organa upravljanja, rukovođenje penzijskim i invalidskim osiguranjem, osnove organizacije, jedinstvene administrativne službe i druga pitanja značajna za organizaciju penzijskog i invalidskog osiguranja.

Prednacrt Zakona dio je seta novih zakona koji uređuju ovu oblast, a zasnivaju se na Strategiji reforme penzijskog sistema u Federaciji BiH, te su izvršena usklađenja sa odredbama Zakona o penzijskom i invalidskom osiguranju. Novim zakonom garantuje se osiguranje zakonitog, racionalnog i efikasnog ostvarivanja prava iz penzijskog i invalidskog osiguranja, te pružanje stručne pomoći osiguranicima prilikom osiguranja prava, provođenje međunarodnih ugovora o socijalnom osiguranju, vodenje evidencija i upravljanje sredstvima i imovinom Zavoda.

Takoder, ovim Prednactrom se, za razliku od važećeg zakona, u nadležnosti kantonalnih administrativnih službi uvodi i utvrđivanje penzijskog staža osiguranika, što do sada nije bio slučaj, a što će osiguranicima uveliko olakšati sam proces ostvarivanja prava na penziju.

S obzirom da se radi o setu zakona koji za cilj imaju reformu penzijskog i invalidskog osiguranja, ovo ministarstvo u velikoj mjeri podržava odredbe Prednacrta Zakona.

Međutim, smatramo da sastav i način izbora članova Upravnog odbora definisan članom 5. ovog prednacrta ne osigurava teritorijalnu zastupljenost članova u upravljačkom tijelu Zavoda na način na koji je to definisano važećim zakonom. Ovo posebno iz razloga što se postojećim odredbama osigurava pravo učešća u radu i zaštiti prava korisnika osiguranja za sve osiguranike i korisnike prava na nivou Federacije, budući da se i sredstva prikupljaju sa njene cijele teritorije, a novim rješenjem se izbor članova fokusira na federalni nivo, bez obzira što se radi o tripartitnom tijelu. Dalje, u obrazloženju se navodi da se novim rješenjem smanjuje broj članova upravnog odbora izostavljanjem članova koje delegiraju kantoni, te da se na taj način vrše i uštede

KW

AK

finansijskih sredstava, međutim, smanjenje od dva člana ne donosi značajne uštede, a onemogućava se korisnicima da kroz svoje predstavnike na kantonalnom nivou osiguraju jednako pravo na korištenje usluga koje im garantuje Zakon o PIO-u.

Novim prijedlogom je predviđeno da se dva člana Upravnog odbora biraju iz reda uposlenika resornog ministarstva u oblasti penzijskog i invalidskog osiguranja i dva člana koje predlaže Federalno ministarstvo finansija jer je finansijski plan nosioca osiguranja sastavni dio budžeta Federacije. Prijedlogom Zakona nadzor nad radom Zavoda vrši Federalno ministarstvo rada i socijalne politike, te u skladu sa posebnim propisima i kroz inspekcijски nadzor od strane nadležnog inspektora umjesto dosadašnjeg Nadzornog odbora. Budući da se Nadzorni odbor ne definiše novim propisom, to znači da se i nadzor i dijelom upravljanje vrši od strane nadležnog ministarstva, te ne podržavamo ukidanje Nadzornog odbora kao nezavisnog tijela.

Također, Prijedlog Zakona ne predviđa na koji način prestaje mandat trenutnog Nadzornog odbora na način kako je to uređeno članom 20. za Upravni odbor, direktora Zavoda, njegove zamjenike i direktore i zamjenike kantonalnih administrativnih službi.

Članom 10. stav (2) Prednacrta Zakona definiše se da članovi Upravnog odbora i direktor ne mogu biti lica koja su dva ili više puta imenovana u Upravni odbor, kao i na poziciju direktora Federalnog zavoda. Smatramo da ograničavanje broja mandata nije najbolje rješenje budući da se za te pozicije traži posebno stručno znanje i iskustvo, pa se osobe koje imaju najviše iskustva u upravljačkim strukturama, ovim članom limitiraju, posebno ukoliko je njihovo znanje i doprinosu radu doveo do poboljšanja rada i kvaliteta pružanja usluga Zavoda.

ku
akc
Dostavljeno:

1x Naslov

1x a/a



MINISTAR

[Signature]
Antonio Šimunović



26-12-2023

Bosnia and Herzegovina
FEDERATION OF BOSNIA AND HERZEGOVINA
MINISTRY OF LABOUR AND SOCIAL POLICY OF THE
FEDERATION OF BOSNIA AND HERZEGOVINA

Broj: 04-021-3932-123 M.T.
Sarajevo, 19.12.2023. godine

**BOSNA I HERCEGOVINA
FEDERACIJA BOSNE I HERCEGOVINE
UNSKO-SANSKI KANTON
POSAVSKI KANTON
TUZLANSKI KANTON
ZENIČKO-DOBOJSKI KANTON
BOSANSKO-PODRINJSKI KANTON-GORAŽDE
SREDNJOBOSANSKI KANTON
HERCEGOVAČKO-NERETVANSKI KANTON
ZAPADNO-HERCEGOVAČKI KANTON
KANTON SARAJEVO
KANTON 10**

n/r premijera

**Predmet: Prednacrt zakona o organizaciji penzijskog i invalidskog osiguranja,
mišljenje, traži se**

Poštovani,

Uz saradnju i pomoć Svjetske banke pokrenute su aktivnosti vezane za drugi dio reforme penzijskog sistema u Federaciji BiH koji podrazumijeva donošenje novog Zakona o organizaciji penzijskog i invalidskog osiguranja u Federaciji BiH. Zakon će podrazumijevati novi način upravljanja nosiocem osiguranja, kao i njegovu efikasniju organizaciju.

Kako su federalna vlast i kantoni nadležni za oblast socijalne politike, odnosno kako federalna vlast ima pravo utvrđivati politiku i donositi zakone koji se tiču ove nadležnosti, a kantoni su posebno nadležni za provođenje socijalne politike i uspostavu službi socijalne zaštite, u prilogu akta, a radi davanja mišljenja, dostavljamo Prednacrt zakona o organizaciji penzijskog i invalidskog osiguranja.

Potrebno je da u roku od (15) petnaest dana od dana prijema ovog akta, Federalnom ministarstvu rada i socijalne politike dostavite predmetno mišljenje. Ukoliko u ostavljenom roku isto ne dostavite smatrat ćemo da na Prednacrt zakona o organizaciji penzijskog i invalidskog osiguranja nemate primjedbi.

S poštovanjem,

Prilog: kao u tekstu

MINISTAR
Adnan Delić

**BOSNA I HERCEGOVINA
FEDERACIJA BOSNE I HERCEGOVINE
FEDERALNO MINISTARSTVO RADA I SOCIJALNE POLITIKE**

Prednacr

**Z A K O N
O ORGANIZACIJI PENZIJSKOG I INVALIDSKOG OSIGURANJA
FEDERACIJE BOSNE I HERCEGOVINE**

Sarajevo, decembar 2023. godine

Z A K O N
O ORGANIZACIJI PENZIJSKOG I INVALIDSKOG OSIGURANJA
FEDERACIJE BOSNE I HERCEGOVINE

I - OSNOVNE ODREDBE

Član 1.
(Predmet propisa)

Ovim zakonom uređuju se organizacija Federalnog zavoda za penzijsko i invalidsko osiguranja (u daljnjem tekstu: Federalni zavod), organi upravljanja i njihove nadležnosti, uvjeti imenovanja organa upravljanja, rukovođenje penzijskim i invalidskim osiguranjem, osnove organizacije jedinstvene administrativne službe i druga pitanja značajna za organizaciju penzijskog i invalidskog osiguranja.

Član 2.
(Federalni zavod)

- (1) Federalni zavod je javna ustanova koja djeluje u skladu sa propisima koji reguliraju rad ustanova, ako ovim zakonom nije drugačije uređeno.
- (2) Federalni zavod je pravna osoba s pravima, obavezama i odgovornošću utvrđenim ovim zakonom, drugim zakonima i Statutom Federalnog zavoda (u daljnjem tekstu: Statut).
- (3) Sjedište Federalnog zavoda je u Mostaru.
- (4) Finansijsko poslovanje Federalnog zavoda obavlja se preko računa budžeta Federacije Bosne i Hercegovine.
- (5) Rad Federalnog zavoda je javan.
- (6) Federalni zavod, putem Federalnog ministarstva rada i socijalne politike (u daljnjem tekstu: Ministarstvo), najmanje jednom godišnje izvještava Vladu Federacije Bosne i Hercegovine (u daljnjem tekstu: Vlada Federacije) i Parlament Federacije Bosne i Hercegovine (u daljnjem tekstu: Parlament Federacije) o svom radu i stanju penzijskog sistema Federacije Bosne i Hercegovine (u daljem tekstu: Federacije).

Član 3.
(Nadležnosti Federalnog zavoda)

Federalni zavod je nosilac penzijskog i invalidskog osiguranja i obavlja sve poslove iz penzijskog i invalidskog osiguranja u skladu sa ovim zakonom, Zakonom o penzijskom i invalidskom osiguranju (u daljnjem tekstu: Zakon), drugim zakonima i Statutu:

- a) osigurava zakonito, racionalno i efikasno ostvarivanje prava iz penzijskog i invalidskog osiguranja,

- b) pruža stručnu pomoć osiguranicima prilikom ostvarivanja prava,
- c) osigurava provođenje međunarodnih ugovora o socijalnom osiguranju,
- d) vodi odgovarajuće evidencije,
- e) posluje sredstvima i imovinom Federalnog zavoda,
- f) obavlja i druge poslove u vezi sa provođenjem i ostvarivanjem prava iz penzijskog i invalidskog osiguranja, a u skladu sa zakonima, Statutom i drugim općim aktima.

II – ORGANIZACIJA I ORGANI FEDERALNOG ZAVODA

Član 4. (Organi Federalnog zavoda)

Organi Federalnog zavoda su Upravni odbor i Direktor.

Član 5. (Upravni odbor Federalnog zavoda)

- (1) Upravni odbor Federalnog zavoda (u daljem tekstu: Upravni odbor) je organ upravljanja i sastoji se od predsjedavajućeg i osam (8) članova.
- (2) Predsjedavajućeg i članove Upravnog odbora imenuje i razrješava Vlada Federacije i to:
 - a) pet (5) članova na prijedlog Vlade Federacije,
 - b) dva (2) člana na prijedlog reprezentativnih udruženja penzionera u Federaciji
 - c) jedan (1) član na prijedlog reprezentativnog većinskog sindikata u Federaciji,
 - d) jedan (1) član na prijedlog reprezentativnog većinskog udruženja poslodavaca u Federaciji.
- (3) Za predsjedavajućeg i članove Upravnog odbora imenuju se osobe koje imaju visoku stručnu spremu, najmanje VII stepena, odnosno visoko obrazovanje prvog (najmanje 240 ECTS bodova), drugog ili trećeg ciklusa Bolonjskog sistema studiranja.
- (4) Mandat predsjedavajućeg i članova Upravnog odbora traje četiri godine. Vlada Federacije može razriješiti predsjedavajućeg ili člana Upravnog odbora i prije isteka mandata.
- (5) Detaljniji uslovi koje mora da ispunjava osoba koja se imenuje u Upravni odbor, kao i uslovi pod kojima može biti razriješena prije isteka mandata, propisuju se ovim zakonom i Statutom.
- (6) U slučaju prestanka mandata članu Upravnog odbora iz bilo kog razloga, prije vremena na koje je imenovan, na prijedlog predlagачa iz stava (2) ovog člana, imenuje se član čiji mandat traje onoliko vremena koliko bi trajao mandat člana na čije mjesto se imenuje.

Član 6.
(Nadležnost Upravnog odbora)

(1) Upravni odbor obavlja sljedeće poslove:

- a) donosi Statut Federalnog zavoda i druge opće akte,
- b) utvrđuje viziju, misiju i strateške planove razvoja Federalnog zavoda,
- c) donosi finansijski plan, usvaja godišnji obračun i izvještaj o radu Federalnog zavoda,
- d) prati priliv sredstava za penzijsko i invalidsko osiguranje i prati finansijsko stanje Federalnog zavoda,
- e) nakon provedenog javnog konkursa daje saglasnost na imenovanje i razrješenje direktora i zamjenika direktora Središnje administrativne službe i direktora kantonalnih administrativnih službi,
- f) uređuje organizaciju Središnje i kantonalnih službi, sistematizaciju poslova i broj izvršilaca,
- g) utvrđuje osnovice za obračun i uplatu doprinosa koje nisu propisane Zakonom o doprinosima,
- h) analizira izvještaj o poslovanju Federalnog zavoda,
- i) vrši uvid u godišnji obračun, odnosno izvještaj o izvršenju finansijskog plana Federalnog zavoda,
- j) po potrebi vrši uvid i provjerava urednost i zakonitost vođenja poslovnih knjiga,
- k) vrši druge poslove u skladu sa zakonima, Statutom i drugim općim aktima Federalnog zavoda.

(2) Način rada, kao i druga pitanja koja se odnose na rad Upravnog odbora, uređuju se Statutom.

Član 7.
(Odlučivanje u Upravnom odboru)

Upravni odbor donosi odluke natpolovičnom većinom glasova imenovanih članova Upravnog odbora.

Član 8.
(Direktor Federalnog zavoda)

- (1) Direktor Federalnog zavoda je organ rukovođenja.**
- (2) Direktora Federalnog zavoda imenuje Vlada Federacije, nakon sprovedenog javnog konkursa.**
- (3) Direktor Federalnog zavoda mora biti osoba koja ima visoku stručnu spremu, najmanje VII stepena, odnosno visoko obrazovanje prvog**

(najmanje 240 ECTS bodova), drugog ili trećeg ciklusa Bolonjskog sistema studiranja.

- (4) Detaljni uslovi koje mora da ispunjava osoba koja se imenuje za direktora, kao i uslovi pod kojima može biti razriješena prije isteka mandata, propisuju se se ovim zakonom i Statutom.
- (5) Direktor Federalnog zavoda imenuje se na period od četiri godine, s tim da može biti razriješen u skladu sa članom 11. ovog Zakona i prije isteka vremena na koje je imenovan, a na prijedlog Ministarstva.
- (6) Direktor federalnog zavoda ima zamjenika koji se pod istim uslovima i na isti način imenuje i razrješava kao i direktor Federalnog zavoda. Zamjenik direktora obavlja poslove koje mu povjeri direktor Federalnog zavoda, a za svoj rad odgovara direktoru Federalnog zavoda.

Član 9.

(Nadležnost direktora Federalnog zavoda)

Direktor Federalnog zavoda obavlja sljedeće poslove:

- a) predstavlja i zastupa Federalni zavod i odgovoran je za zakonitost rada,
- b) organizuje rad i poslovanje Federalnog zavoda,
- c) izvršava odluke Upravnog odbora,
- d) izvještava Ministarstvo, Vladu Federacije i Parlament Federacije o radu Federalnog zavoda, te prezentuje donesene planove i izvještaje.
- f) na zahtjev Ministarstva dostavlja tražene informacije, analize, procjene i druge materijale,
- g) uz prethodnu saglasnost Upravnog odbora imenuje direktora i zamjenika direktora Središnje i direktore kantonalnih službi,
- h) vrši druge poslove u skladu sa zakonima i Statutom Federalnog zavoda.

Član 10.

(Uvjeti za imenovanje)

- (1) Lica koja se imenuju u Upravni odbor, kao i direktor Federalnog zavoda moraju biti lica sa stručnim znanjem i iskustvom iz oblasti penzijskog i invalidskog osiguranja, finansija ili osiguranja i moraju imati najmanje pet godina radnog staža na navedenim poslovima.
- (2) Član Upravnog odbora i direktor Federalnog zavoda ne može biti:
 - a) lice koje je dva ili više puta bilo imenovano u Upravni odbor, kao i na poziciju direktora Federalnog zavoda,
 - b) lice koje je osuđivano za krivična djela koja ga čine nedostojnim za obavljanje te funkcije, a naročito krivičnih djela protiv privrede, poslovanja i sigurnosti pravnog prometa,
 - c) odgovorno lice u privrednom društvu nad kojim je pokrenut stečajni postupak,
 - d) lice koje ima poslovni odnos sa Federalnim zavodom, odnosno lice čije djelovanje može dovesti do sukoba interesa.

Član 11.
(Razrješenje)

Predsjedavajući i članovi Upravnog odbora, direktor odnosno zamjenik direktora Federalnog zavoda, direktor i zamjenik direktora središnje, kao i direktori kantonalnih administrativnih službi Federalnog zavoda razrješavaju se u slučaju:

- a) nastanka okolnosti iz člana 10. stav (2),
- b) ako ne postupaju po propisima, Satutu i drugim općim aktima Federalnog zavoda,
- c) u slučaju nepostupanja po obvezujućim instrukcijama Ministarstva vezanim za pravilnu primjenu propisa,
- d) ako zanemaruju i nesavjesno obavljaju svoje dužnosti.

III – SREDIŠNJA ADMINISTRATIVNA SLUŽBA I KANTONALNE ADMINISTRATIVNE SLUŽBE

Član 12.
(Središnja administrativna služba i kantonalne administrativne službe)

- (1) Obavljanje pravnih, ekonomskih, administrativnih i drugih poslova Federalnog zavoda organizira se u Središnjoj administrativnoj službi i (10) deset kantonalnih administrativnih službi.
- (2) Središnja administrativna služba i kantonalne administrativne službe su unutrašnje organizacione jedinice Federalnog zavoda.
- (3) Sjedište Središnje administrativne službe je u sjedištu Federalnog zavoda, a radni procesi će se odvijati u Sarajevu i Mostaru. Kantonalna administrativna služba pokriva područje jednog kantona u Federaciji. Upravni odbor Federalnog zavoda će Statutom odrediti sjedišta administrativnih službi.
- (4) Organizacija i obavljanje poslova iz stava (1) ovog člana treba da se zasniva na načelima: zakonitosti, efikasnosti i transparentnosti, a detaljnije će se urediti Statutom Federalnog zavoda i pravilnikom o unutrašnjoj organizaciji i sistematizaciji radnih mjesta.
- (5) Središnjom administrativnom službom rukovodi direktor, kome u radu pomaže zamjenik direktora.
- (6) Kantonalnim administrativnim službama rukovode direktori, koje u skladu sa članom 6. stav (1) tačka e) ovog zakona, imenuje direktor Federalnog zavoda.

Član 13.
(Nadležnost Središnje administrativne službe)

U Središnjoj službi obavljaju se sljedeći poslovi:

- a) rješavanje u drugom stepenu u vezi prava i obaveza iz penzijskog i invalidskog osiguranja,
- b) rješavanje u drugom stepenu u vezi prava i obaveza iz penzijskog i invalidskog osiguranja primjenom međunarodnih ugovora o socijalnom osiguranju,
- c) koordinacija i praćenje primjene zakona, općih akata i međunarodnih ugovora o socijalnom osiguranju i davanje uputa za rad,
- d) izrada prijedloga Statuta i općih akata,
- e) obavljanje i drugih poslova u skladu sa zakonima, Statutom i općim aktima Federalnog zavoda.

Član 14.

(Nadležnost kantonalnih administrativnih službi)

- (1) U kantonalnim administrativnim službama obavljaju se sljedeći poslovi:
 - a) rješavanje u prvom stepenu u vezi prava i obaveza iz penzijskog i invalidskog osiguranja;
 - b) rješavanje u prvom stepenu u vezi prava i obaveza iz penzijskog i invalidskog osiguranja primjenom međunarodnih ugovora o socijalnom osiguranju;
 - c) pružanje stručne pomoći u postupku ostvarivanja prava;
 - d) utvrđivanje penzijskog staža osiguranika;
 - e) obavljanje drugih poslova u skladu sa Statutom i općim aktima Federalnog zavoda.

IV – STATUT

Član 15.

(Statut Federalnog zavoda)

- (1) Federalni zavod ima Statut koji donosi Upravni odbor zavoda, a na koji saglasnost daje Vlada Federacije.
- (2) Statutom se detaljnije uređuje:
 - a) djelokrug rada, ovlaštenja i odgovornosti direktora Federalnog zavoda, te direktora Središnje administrativne službe, kao i direktora kantonalnih administrativnih službi,
 - b) detaljni uslovi za imenovanje direktora i zamjenika direktora Federalnog zavoda, direktora Središnje administrativne službe i direktora kantonalnih administrativnih službi,
 - c) način zauzimanja stavova i odlučivanja,
 - d) javnost rada Federalnog zavoda,
 - e) osnovi organizacije Središnje administrativne službe, kantonalnih administrativnih službi i njihove nadležnosti,
 - f) druga pitanja od značaja za provođenje penzijskog i invalidskog osiguranja i za rad Federalnog zavoda.

(3) Statut Federalnog zavoda objavljuju se "Službenim novinama Federacije BiH".

V NADZOR I KAZNE NE ODREDBE

Član 16. (Nadzor)

(1) Nadzor nad zakonitošću primjene propisa i rada Federalnog zavoda vrši Ministarstvo.

(2) U skladu sa posebnim propisima nadzor nad radom vrši se kroz inspekcijski nadzor od strane nadležnog inspektora, koji ima pravo preduzima mjere prema ovlaštenjima propisanim ovim zakonom i zakonom kojim se uređuje odgovarajuća oblast inspekcija.

Član 17. (Novčane kazne)

(1) Novčanom kaznom od 500 KM do 5.000 KM kazniće se Federalni zavod ako:

- a) postupa suprotno odredbama ovog zakona,
- b) ne obezbijedi poštivanje načela javnosti rada,
- c) ne organizuje rad Federalnog zavoda u skladu sa članom 2. ovog zakona,
- d) ne organizira rad Središnje i kantonalnih administrativnih službi Federalnog zavoda u skladu sa članom 14, 15. i 16. ovog zakona,
- e) ne uskladi svoje opšte akte i organizaciju u roku iz člana 20. ovog zakona,
- f) ne postupa po obvezujućim instrukcijama Ministarstva vezanim za pravilnu primjenu propisa.

(2) Za prekršaj iz stava (1) ovog člana novčanom kaznom od 500 KM do 1.500 KM kazniće se i odgovorno lice Federalnog zavoda.

VI PRIJELAZNE I ZAVRŠNE ODREDBE

Član 18 (Usklađivanje akta Federalnog zavoda)

(1) Federalni zavod će svoje opšte akte i organizaciju uskladiti sa odredbama ovog zakona u roku od 90 dana od dana stupanja na snagu ovog zakona.

(2) Do donošenja akata usklađenih sa ovim zakonom primjenjivati će se akti koji su bili na snazi na dan stupanja na snagu ovog zakona ako nisu u suprotnosti sa ovim zakonom.

Član 19.
(Trajanje mandata)

Predsjedavajućem i članovima Upravnog odbora Federalnog zavoda, direktoru i zamjeniku direktora Federalnog zavoda, direktoru i zamjeniku direktora Središnje administrativne službe, kao i direktorima i zamjenicima direktora u kantonalnim administrativnim službama, bez obzira na odredbe ovog zakona mandat traje do isteka perioda na koji su imenovani, osim u slučajevima propisanim članom 11. tač. b), c) i d) ovog zakona.

Član 20.
(Računanje broja mandata)

U ograničenju broja mandata iz člana 10. stav (2) tačka a) računaju se i mandati koje je lice imenovano u Upravni odbor, kao i na poziciju direktora i zamjenika direktora Federalnog zavoda obavljalo u periodu prije stupanja na snagu ovog zakona.

Član 21.
(Prestanak važenja propisa)

Stupanjem na snagu ovog zakona prestaje da važi Zakon o organizaciji penzijskog i invalidskog osiguranja ("Službene novine Federacije BiH", br. 49/00, 32/01 i 18/05)

Član 22.
(Stupanje na snagu)

Ovaj zakon stupa na snagu osmog dana od dana objavljivanja u "Službenim novinama Federacije BiH".

O b r a z l o ž e n j e

Prednacrtu Zakona o organizaciji penzijskog i invalidskog osiguranja

I USTAVNI OSNOV

Ustavni osnov za donošenje ovog Zakona nalazi se u odredbama člana III. 2. e), člana III. 3. (3) i člana III. 4. j) Ustava Federacije Bosne i Hercegovine, prema kojima su federalna vlast i kantoni nadležni za oblast socijalne politike. Federalna vlast ima pravo utvrđivati politiku i donositi zakone koji se tiču ove nadležnosti, a kantoni su posebno nadležni za provođenje socijalne politike i uspostavu službi socijalne zaštite.

Prema odredbama člana IV A. 20. (1) d) Ustava Federacije Bosne i Hercegovine, Parlament Federacije Bosne i Hercegovine nadležan je za donošenje Zakona o obavljanju funkcija federalne vlasti.

U skladu sa članom 27. Poslovnika o radu Vlade Federacije Bosne i Hercegovine - Prečišćeni tekst - („Službene novine Federacije BiH“, br. 6/10, 37/10, 62/10, 39/20 i 67/21), Prednacrt Zakona o organizaciji penzijskog i invalidskog osiguranja, bit će dostavljen Federalnom ministarstvu finansija/finansija, Federalnom ministarstvu pravde i Uredu Vlade Federacije Bosne i Hercegovine za zakonodavstvo i usklađenost sa propisima Evropske unije, radi davanja mišljenja.

II NAČELA NA KOJIMA SE ZASNIVA ZAKON

Ovaj Zakon se zasniva na načelima zakonitosti, funkcionalnosti, ekonomičnosti, efikasnosti, javnosti i transparentnosti.

II RAZLOZI ZA DONOŠENJE ZAKONA

Dokumentom Strategija reforme penzijskog sistema u Federaciji BiH, u čijoj su izradi, između ostalih, učestvovali predstavnici sindikata, poslodavaca i penzionera, a koja je razmatrana i usvojena na Parlamentu Federacije utvrđeni su osnovni reformski pravci, te propisana izrada seta novih zakona iz ove oblasti uključujući i Zakon o organizaciji penzijskog i invalidskog osiguranja.

IV OBRAZLOŽENJE PREDLOŽENIH PRAVNIH RJEŠENJA

Članom 1. propisan je predmet Zakona o organizaciji penzijskog i invalidskog osiguranja, odnosno organizacija Federalnog zavoda za penzijsko i invalidsko osiguranja, organi upravljanja i njihove nadležnosti, uvjeti imenovanja organa upravljanja, rukovođenje penzijskim i invalidskim osiguranjem, osnove organizacije jedinstvene administrativne službe i druga pitanja značajna za organizaciju penzijskog i invalidskog osiguranja.

Članom 2. propisano je da je Federalni zavod javna ustanova koja djeluje u skladu sa propisima koji regulišu rad ustanova, s pravima, obavezama i odgovornošću utvrđenim ovim zakonom, drugim zakonima i Statutom Federalnog zavoda. U tom smislu Federalni zavod je osnovan za trajno obavljanje djelatnosti u oblasti penzijskog i invalidskog osiguranja u interesu Federacije BiH, utvrđenih zakonom, a bez cilja u vidu stjecanja dobiti (podrazumijeva se trajno i nesmetano obavljanje djelatnosti u javnom interesu). Nadalje, utvrđeno je da je sjedište Federalnog zavoda u Mostaru. U ovom dijelu napominjemo da nema promjena u odnosu na raniji zakon, jer je sjedište ostalo nepromijenjeno, te da su u uporednom zakonodavstvu bez izuzetka nosioci osiguranja osnovani kao javne ustanove. Novina u odnosu na raniji propis je odredba da se finansijsko poslovanje Federalnog zavoda obavlja preko računa budžeta Federacije BiH. Bitno je napomenuti kako je Federalni zavod u skladu sa odredbom člana 130. Zakona o penzijskom i invalidskom osiguranju, već uspostavio trezorski način poslovanja i stekao status budžetskog korisnika, tako da ova izmjena samo predstavlja harmonizaciju dva propisa. Rad Federalnog zavoda je javan, kao i obaveza Federalnog zavoda da putem nadležnog ministarstva, o svom radu, najmanje jednom godišnje izvještava Vladu Federacije BiH i Parlament Federacije BiH. Ova odredba je također novina, jer je u ranijem propisu postojala samo izričita obveza da Nadzorni odbor o svom radu izvještava Parlament Federacije BiH. Takva odredba je bila nepotpuna, gdje se Parlament upoznao sa radom i sjednicama Nadzornog odbora, a ne cjelokupnim radom Federalnog zavoda, stanju u oblasti i drugim bitnim pitanjima za rad nosioca osiguranja. Radi navedenog je propisana izričita obaveza da se putem godišnjeg izvještaja o radu, Vlada i Parlament upoznaju o stanju i radu nosioca osiguranja.

Članom 3. pobrojani su osnovni poslovi koje obavlja Federalni zavod, koji proističu iz važećih propisa i to: poslovi iz penzijskog i invalidskog osiguranja u skladu sa ovim zakonom, Zakonom o penzijskom i invalidskom osiguranju, drugim zakonima i Statutu. Također, utvrđeno je da Federalni zavod osigurava zakonito, racionalno i efikasno ostvarivanje prava iz penzijskog i invalidskog osiguranja, pruža stručnu pomoć osiguranicima prilikom ostvarivanja prava, osigurava provođenje međunarodnih ugovora o socijalnom osiguranju, vodi odgovarajuće evidencije, posluje sredstvima i imovinom Federalnog zavoda, obavlja i druge poslove u vezi sa provođenjem i ostvarivanjem prava iz penzijskog i invalidskog osiguranja, a u skladu sa zakonima, Statutom i drugim općim aktima. Novina u odnosu na raniji propis je da se radi bitnosti dodatno istakne obaveza pružanja pomoći strankama koja je propisana članom 95. Zakona o penzijskom i invalidskom osiguranju. Propisivanje ove odredbe u zakonu o organizaciji ima za svrhu i da u organizacionom smislu stvori obavezu nosiocu osiguranja, da osigura sve preduvjete za poštivanje zakonske norme.

Članom 4. propisano je da su organi Federalnog zavoda Upravni odbor i Direktor. Ovaj član je logičan slijed odredbe člana 2. ovog zakona, jer su propisom koji reguliše rad ustanova propisani organi ustanove. Kada je u pitanju

uporedno zakonodavstvo upoznajemo da je praksa vrlo ujednačena i da nema značajnijih odstupanja.

Članom 5. definisano je da je Upravni odbor organ upravljanja, te da se sastoji od predsjedavajućeg i osam članova koje imenuje i razrješava Vlada Federacije. Sastav Upravnog odbora bazira se na principima tripartitnog odlučivanja. Naime, sve grupe koje bilo kao predlagači propisa i kreatori politika, bilo kao aktivni osiguranici ili korisnici prava iz penzijskog i invalidskog osiguranja će biti dio Upravnog odbora. Navedeno nije strano ni u zemljama okruženja pa je Upravno vijeće/Upravni odbor Republike Hrvatske/Republike Srbije sastavljeno po istom principu. Također, i u drugom bosanskohercegovačkom entitetu postoji ovakav sastav Upravnog odbora. Pet članova se imenuju na prijedlog Vlade Federacije, dva člana imenuju se na prijedlog reprezentativnih udruženja penzionera u Federaciji Bosne i Hercegovine, a po jedan član na prijedlog reprezentativnog većinskog sindikata u Federaciji BiH i reprezentativnog većinskog udruženja poslodavaca u Federaciji BiH. Nadalje, ovim članom propisani su uvjeti za imenovanje, te dužina mandata. Ovakav sastav tijela koje upravlja nosiocem osiguranja pokazao se kao veoma uspješan, jer je sastavljen od onih koji konzumiraju prava (penzionera), dijela radno aktivnog stanovništva tj. zaposlenih koji plaćaju doprinose (sindikata), te poslodavaca koji su također vrlo zainteresovani za ovaj segment radi svog poslovanja odnosno činjenice da su i sami obveznici doprinosa, te da praktično vrše uplatu doprinosa za penzijsko i invalidsko osiguranje. Kao vezivno tkivo koje svojom stručnošću, poznavanjem propisa, problema vezanih za rad i funkcionisanje penzijskog sistema u cjelini, nadopunjuje zainteresovane strane, predviđeni su članovi iz reda uposlenika resornog ministarstva u oblasti penzijskog i invalidskog osiguranja. Iz istog razloga propisano je učešće dva člana na prijedlog Federalnog ministarstva finansija, koje ima značajnu ulogu prema novom Zakonu o penzijskom i invalidskom osiguranju, jer je finansijski plan nosioca osiguranja sastavni dio budžeta Federacije BiH, te zajedno sa resornim ministarstvom ima utjecaja na visinu penzija, odnosno finansijsku stabilnost nosioca osiguranja. Novina su i dva člana iz reda predstavnika penzionera, koji praktično predstavljaju dva reprezentativna udruženja sa sjedištem u Sarajevu i Mostaru.

Ovaj član predstavlja značajan pomak u odnosu na dosadašnji propis koji je predviđao da se upravni odbor sastoji od 10 predstavnika kantona i jednog predstavnika penzionera, gdje predstavnici kantona u smislu propisa iz penzijskog i invalidskog osiguranja nisu imali nikakvu pravnu logiku. Bitno je istaknuti kako je pored kvalitativnog pomaka napravljena i ušteda finansijskih sredstava jer je ukupan broj članova upravnog odbora smanjen.

Članom 6. propisano je koje poslove obavlja Upravni odbor, kao i da će se sva druga pitanja koja nisu propisana zakonom urediti Statutom Federalnog zavoda. Radi se o standarnim nadležnostima koje u pravilu ima svaki organ upravljanja, a koje predstavljaju donošenje svih bitnih odluka za penzijski sistem u Federaciji BiH. Pri tome treba imati u vidu planske i finansijske dokumente koji predstavljaju osnov za funkcionisanje sistema i isplatu penzija.

Finansijske odluke nose značajnu težinu koja se mjeri stotinama miliona KM, pa je posve logično da Upravni odbor kao skupno tijelo razmatra i donosi iste.

Članom 7. propisan je način odlučivanja Upravnog odbora na način da se odluke donose natpolovičnom većinom glasova imenovanih članova Upravnog odbora. Ovo rješenje je praktično i općeprihvaćeno, te se razlikuje od ranijeg prema kojem je upravni odbor donosio odluke dvotrećinskom većinom glasova imenovanih članova Upravnog odbora. Kako je vidljivo predviđeno je rješenje koje podrazumijeva tzv. prostu većinu, umjesto kvalifikovane većine. Na ovaj način rješavaju se potencijalni zastoji u radu Upravnog odbora što je s obzirom na nadležnosti istog vrlo opasno jer dovodi u pitanje funkcionisanje penzijskog sistema u Federaciji BiH.

Članom 8. propisano je da je direktor Federalnog zavoda organ rukovođenja, a da ga imenuje Vlada, nakon provedenog javnog konkursa. Nadalje, ovim članom propisani su uvjeti za imenovanje, kao i dužina mandata direktora. Izričito propisivanje mogućnosti i razloga za razrješenje direktora je novina u odnosu na prethodno rješenje. Razlog je praktične prirode gdje smo imali situacije da direktor ne radi svoj posao savjesno ili ga rade protivno propisima, ali radi nepostojanja izričite zakonske norme koja uređuje ovo pitanje, to praktično nije bilo moguće prije isteka mandata razriješiti direktora. S druge strane propisani su i razlozi za smjenu tako da se diskrecija ili samovolja smanjuje na najmanju moguću mjeru.

Članom 9. propisano je koje poslove obavlja direktor i to predstavlja i zastupa Federalni zavod i odgovoran je za zakonitost rada, organizuje rad i poslovanje Federalnog zavoda, izvršava odluke Upravnog odbora, izvještava Ministarstvo, Vladu Federacije i Parlament Federacije o radu Federalnog zavoda, te prezentuje donesene planove i izvještaje, na zahtjev Ministarstva dostavlja tražene informacije, analize, procjene i druge materijale, uz prethodnu saglasnost Upravnog odbora imenuje direktora i zamjenika direktora Središnje i direktore kantonalnih službi, vrši druge poslove u skladu sa zakonima i Statutom Federalnog zavoda.

Kako je i vidljivo riječ je poslovima koji podrazumijevaju rukovođenje Federalnim zavodom i koji najvećim dijelom obuhvataju nadležnosti iz propisa o radu ustanova. Međutim opis nadležnosti je u odnosu na ranije rješenje proširen u smislu obaveze izvještavanja koja je po logici stvari data direktoru, kao i izričitoj obavezi dostave stručnih materijala informacija i dr, kojima raspolaže Federalni zavod, a koji su neophodni resornom ministarstvu u vršenju poslova nadzora nad zakonitim radom, informisanja Vlade, Parlamenta i sl.

Članom 10. propisano je koje uvjete treba da ispunjavaju lica koje se imenuju u Upravni odbor, kao i direktor. Također istim članom propisano je da član Upravnog odbora i direktor ne može biti lice koje je dva ili više puta bilo imenovano u Upravni odbor, kao i na poziciju direktora Federalnog zavoda, lice

koje je osuđivano za krivična djela koja ga čine nedostojnim za obavljanje te funkcije a naročito krivičnih dijela protiv privrede, poslovanja i sigurnosti pravnog prometa, odgovorno lice u privrednom društvu nad kojim je pokrenut stečajni postupak, te lice koje ima poslovni odnos sa Federalnim zavodom, odnosno lice čije djelovanje može dovesti do sukoba interesa. Na ovaj način sprečava se imenovanje istih lica u Upravni odbor, kao i na poziciju direktora Federalnog zavoda, te druge situacije u kojima lice ne može biti imenovano u Upravni odbor kao i na poziciju direktora Federalnog zavoda.

Ovako koncipiran član nije postojao u ranijem zakonu, što se pokazalo kao vrlo loše rješenje. Naime vrlo kratko i nejasno su bili definisani pozitivni uslovi koje po zakonu mora ispunjavati lice koje se imenuje u organe Federalnog zavoda. Ovom normom izvršeno je preciziranje na način da su propisane oblasti koje garantuju da će u organe biti imenovane osobe koje imaju stručna znanja za obavljanje funkcija. Iz istovjetnog razloga precizirani su negativni uslovi koji sprečavaju da neadekvatne osobe budu u poziciji da budu imenovane.

Članom 11. izričito je propisana mogućnost da se prije isteka mandata pod određenim uslovima razrješavaju član odnosno predsjedavajući Upravnog odbora, direktor odnosno zamjenik direktora Federalnog zavoda, kao i direktor odnosno zamjenik direktora središnje, kao i direktori kantonalnih administrativnih službi i to:

- a) u slučaju nastanka okolnosti iz člana 10. stav (2) (lice koje je dva ili više puta bilo imenovano u Upravni odbor, kao i na poziciju direktora Federalnog zavoda, lice koje je osuđivano za krivična djela koja ga čine nedostojnim za obavljanje te funkcije a naročito krivičnih dijela protiv privrede, poslovanja i sigurnosti pravnog prometa, odgovorno lice u privrednom društvu nad kojim je pokrenut stečajni postupak i lice koje ima poslovni odnos sa Federalnim zavodom, odnosno lice čije djelovanje može dovesti do sukoba interesa)
 - a) ako ne postupaju po propisima, Satutu i drugim općim aktima Federalnog zavoda,
 - b) u slučaju neprovođenja politike Vlade Federacije ili nepostupanja po uputama Ministarstva,
 - c) ako zanemaruju i nesavjesno obavljaju svoje dužnosti.

Članom 12. propisan je osnov organizacije Središnje administrativne službe, te kantonalnih administrativnih službi. U tom smislu propisano je da se poslovi penzijskog i invalidskog osiguranja obavljaju u unutrašnjim organizacionim jedinicama i to Središnjoj administrativnoj službi i deset kantonalnih administrativnih službi. Sjedište Središnje administrativne službe je u sjedištu Federalnog zavoda, a radni procesi će se odvijati u Sarajevu i Mostaru. Kantonalna administrativna služba pokriva područje jednog kantona u Federaciji. Upravni odbor Federalnog zavoda će Statutom odrediti sjedišta administrativnih službi. Nadalje organizacija i obavljanje poslova unutrašnjih jedinica zasniva se na načelima: zakonitosti, efikasnosti i transparentnosti. Novo rješenje u onosu na raniji propis je da Središnjom administrativnom službom rukovodi direktor, kome u radu pomaže zamjenik direktora, a kantonalnim administrativnim službama

rukovode direktori koje u skladu sa članom 6. stav (1) tačka e) ovog zakona, imenuje direktor Federalnog zavoda. Mišljenja smo da je na ovaj način zadovoljen princip racionalnog, efikasnog obavljanja poslova i pojednostavljena procedura donošenja odluka, odnosno rukovođenja i izvršavanja svakodnevnih poslova iz nadležnosti središnje i kantonalnih službi. Također, bitno je istaknuti da je postignuta i vertikalna struktura upravljanja, gdje će direktor Zavoda kao odgovorna osoba imati utjecaja da uz saglasnost Upravnog odbora imenuje rukovodice, gdje se uspostavlja odgovarajuća ravnoteža između prava i obaveza istog. Naime potpuno je opravdano da direktor koji po zakonu odgovara za rad direktora središnje i kantonalnih službi ima mogućnost da bira saradnike koji imaju sposobnost za obavljanje odgovornih poslova iz nadležnosti središnje i kantonalnih službi. Jedanaest pozicija zamjenika direktora je ukinuto, čime je napravljena značajna finansijska ušteda a koja neće imati negativnog utjecaja na poslovanje i izvršavanje obaveza, već upravo suprotno postiže se efikasnost u donošenju odluka. Kroz sistematizaciju se može predvidjeti veći broj zaposlenika koji rade na rješavanju čime bi se također riješio konstantan problem dugog trajanja upravnih postupaka pri ostvarivanju prava iz penzijskog i invalidskog osiguranja.

Članom 13. propisano je koji se poslovi obavljaju u Središnjoj administrativnoj službi. U ovom segmentu nema značajnije razlike u odnosu na poslove koje je ova služba obavljala po ranijem propisu, osim dopune u vidu preciziranja da ista daje upute za rad kantonalnim administrativnim službama.

Članom 14. propisano je koji se poslovi obavljaju u kantonalnim administrativnim službama. U ovom dijelu u odnosu na raniji propis dodate su dvije nove nadležnosti: pružanje stručne pomoći u postupku ostvarivanja prava i utvrđivanje penzijskog staža osiguranika. Naime članovima 95. i 99. Zakona o penzijskom i invalidskom osiguranju propisana je obaveza Federalnog zavoda da pruža stručnu pomoć u postupku ostvarivanja prava, a radi potreba poslodavaca i zaposlenika vezanih za ostvarivanje prava iz radnog odnosa. Predviđen je potpuno novi segment koji nosilac osiguranja do sada nije obavljao a odnosi se na postupak utvrđivanja staža koje podatke vodi nosilac osiguranja. Dakle, na odgovarajući način harmoniziraju se odredbe Zakona o penzijskom i invalidskom osiguranju sa odredbama Zakona o organizaciji PIO.

Članom 15. propisan je obaveza donošenja Statuta Federalnog zavoda, te data osnova sadržaja samog Statuta, kao temeljnog općeg internog akta nosioca osiguranja. Također propisano je da saglasnost na Statut Federalnog zavoda daje Vlada Federacije, kao i da se Statut objavljuje u "Službenim novinama Federacije BiH". Propisanim rješenjima se nastojala postići transparentnost u radu nosioca osiguranja, te odgovarajući vid vršenja nadzora i kontrole nad zakonitošću i usklađenošću općih akata sa zakonima i drugim propisima s jedne strane i dati mogućnost lakše izmjene i fleksibilnosti samih izmjena općih akata. U tom smislu, saglasnost na iste nakon obrade i analize od resornog ministarstva daje Vlada Federacije BiH. Ovo rješenje je novina jer je saglasnost na statut do

sada davao Parlament Federacije BiH, što se praktično pokazalo kao neefikasno rješenje.

Članom 16. propisano je da nadzor nad radom Federalnog zavoda vrši Federalno ministarstvo rada i socijalne politike. Drugim stavom propisan je izuzetan osnov za provođenje inspeksijskog nadzora, a u skladu sa zakonom kojim se uređuje odgovarajuća oblast inspekcija.

Članom 17. propisane su novčane kaznene odredbe za Federalni zavod, kao i za odgovorno lice u Federalnom zavodu. Raniji propis nije sadržavao kaznene odredbe, što je bila velika manjkavost odnosno nedostatak istog. Imali smo situaciju da resorno ministarstvo, niti nadležne inspekcije praktično nisu imali osnova za eventualno izricanje kazni pa čak niti za pokretanje inspeksijskog nadzora u ovom segmentu. Svaka odredba zakona bez adekvatne sankcije za njeno nepoštivanje je nepotpuna, radi čega se u ovom dijelu propis upotpunio.

Članom 18. Započinje poglavlje prijelaznih i završnih odredbi ovog zakona, gdje je kao logičan slijed ovim članom propisana obaveza Federalnog zavoda da u roku od 90 dana od dana stupanja na snagu uskladi svoje opće akte i organizaciju. Također, propisano je da će se do donošenja novih općih akata, primjenjivati akti koji su bili na snazi na dan stupanja na snagu ovog zakona, ako nisu u suprotnosti sa ovim zakonom. Ovo je standardna formulacija koja omogućava da se u prelaznom periodu odvijaju nesmetano poslovi iz okvira nadležnosti Federalnog zavoda.

Članom 19. propisano je trajanje mandata predsjedavajućem i članovima Upravnog odbora i Nadzornog odbora, direktoru i zamjeniku direktora Federalnog zavoda, direktoru i zamjeniku direktora Središnje administrativne službe, kao i direktorima i zamjenicima u kantonalnim administrativnim službama. Naime, propisano je da bez obzira na odredbe ovog zakona mandat traje do isteka perioda na koji su imenovani, osim u slučajevima propisanim članom 11. ovog zakona. Kroz ovu normu rješeno je pitanje trajanja aktualnih mandata u prelaznom periodu

Članom 20. propisano je da se ograničenje broja mandata iz člana 10. stav (2) tačka a) odnosi se i na period prije stupanja na snagu ovog zakona. Navedeno ograničenje je postojalo i u ranijem Zakonu o organizaciji penzijskog i invalidskog osiguranja, međutim ta odredba nije bila jasno precizirana pa je prouzrokovala različita tumačenja, kao i različita shvatanja njene namjene. Ovako formulisanom odredbom otklanjanju se sve nedoumice i jasno se precizira da osoba može biti imenovana u Upravni odbor, kao i na poziciju direktora najviše dva puta, uzimajući u obzir i period prije stupanja na snagu ovog zakona. Ovakva odredba sadržana je i u uporednom zakonodavstvu bez izuzetka.

Članom 21. propisano je da stupanjem na snagu ovog Zakona prestaje da važi Zakon o organizaciji penzijskog i invalidskog osiguranja ("Službene novine Federacije BiH", br. 49/00, 32/01 i 18/05).

Članom 22. propisano je da ovaj Zakon stupa na snagu osmog dana od dana objavljivanja u "Službenim novinama Federacije BiH".

V FINANSIJSKA SREDSTVA

Za provođenje ovog zakona nisu potrebna dodatna sredstva iz budžeta Federacije BiH.